

As 't op is

Corona maken meer kapot dan wi'j willen toegèven. An eel völle zaken, wöör wi'j met zien allen zo an ewent waeren, kwamp deur bepärkende maotregelen, angst en onzeker-eid van 't iene moment op 't andere een ende.

Zo ook an de Dialectkringe Salland & Oost Veluwe - wärgroep Zwolle. Deur 't verbod op samenkomst (*Lockdown*) wier 't unmeugelijk bi'j mekander te kommen en bint alle activiteiten stil-elegd. En a-j dan de zake weer zollen willen opstärten blieven der een antal onzekere naoweeën bestaon.

Umdät de groep letterlijk uutstärvend wazzen, waren der nog maer 8 leden actief van de iens uut meer dan därtig mensen bestaonde groep. Umme an de twiefelachte bestaonsrecht een ende te maken is ter beslöten as wärgroep Zwolle te stoppen, zodät iederiene weten wöör zi'j an toe bint. 't Zuken naor een lokasie veur 't bi'j mekaere kommen wörrn steeds muulijkerder en rèkent ter op . . . **wi'j bint nog niet van de Corona-perikelen en/of een influenza-golf of.** *Gao der gerust van uut dat dät een jöörliks terugkerende eisa wörrn.*

En dan ku-j veur oezelf wel invullen dät bi'j 't steeds maer older wörrn, ook de ongemakken toenemmen. Dit is in beginsel de basisgedachen umme te stoppen . . dan bi-j duidelijk !

Zo kwamp 't dät de aover-eblöven deelnemers uut gewoonte weer bi'j makander kwammen, umme, zoals de skrievert altied skreven, . . **de pot te verteren** . . in 't Ärt van Zuud. En döör bi'j de gezamenlijke **ienvoldige doch voedzame maaltied**, ons deur een bärg brood en aover-eerlijk beleg en te wörstelen.

Now is èten nooit gien straffe . . dus dät giet wel lukken.



En zo kunnen wi'j tijdens 't èten nog een bettien bi'jpraoten en wel ervaeren dät veural de dames " **'t prötien prut** " (zoas 't de leste tiden gonk) toch nog wel zullen missen, maer ook de wetenskap ebben dät iederiene met 't older wörren in jören ook met steeds toenemende ongemakken te maken kreg, wöördeur 't samenkommen een muilijheid zollen wörren.

Goed 't wazzen dan de zaoterdag veur Pinsteren . . en a-j dan een bettien naodenken . . adden wi'j 't ook niet gekker kunnen maken. Pisteren . . 't moment wöörbi'j de apostelen van Jezus iniens de gave kregen in alle talen te kunnen sprèken. (*zich verstaonbaer konnen maken*) is dus veur de Dialectkringe-Zwolle een eindpunt ewörren . . . en is die uut-epraot.

Mien va ef mi'j altied alwel een raere apostel evunnen, dus zalle ik wel in 't Zwols blijven praoten en skrieven en der met gangsgaon en zo now en dan nog iens van mi'j laoten euren. Maer in dät geval volg ik alleen mien eigen(-wieze) kop en zalle 't ook wel nooit van de kansel oeven preeken. De egöven umstandig-eden blijven . . de vut wazzen der uut . . de Dialectkringe-Zwolle is nao ruum zesendärtig jöör ter ziele.

As 't op is . . .



. . .is 't èten edaon !

De anwezige dames ebben wi'j maer een bussien bloemen an-eböden, wöörnao een ieder weer ziens weegs is egaon.

Spiet kump altijd achterof en 't wörren pas emist as 't ter niet meer is!

7 juni 2022

